



REPUBLIKA E SHQIPËRISË
KËSHILLI I MINISTRAVE

V E N D I M

Nr. 672, datë 22.11.2017

PËR

**PROPOZIMIN E PROJEKTLIGJIT “PËR KRIJIMIN E AGJENCISË
KOMBËTARE TË DIASPORËS”**

Në mbështetje të neneve 81, pika 1, dhe 100, të Kushtetutës, me propozimin e ministrit të Shtetit për Diasporën, Këshilli i Ministrave

V E N D O S I:

Propozimin e projektligjit “Për krijimin e Agjencisë Kombëtare të Diasporës”, për shqyrtim e miratim në Kuvendin e Republikës së Shqipërisë, sipas tekstit dhe relacionit që i bashkëlidhen këtij vendimi.

Ky vendim hyn në fuqi menjëherë.

KRYEMINISTRI


EDIRAMA

MINISTRI I SHETITIT
PËR DIASPORËN

PANDELI MAJKO



NR.PROT.5280/8
DATË 23.11 2017

KUVENDIT
MINISTRIT TË SHTETIT PËR DIASPORËN

Sekretari i Përgjithshëm

Engjell AGAÇI





REPUBLIKA E SHQIPËRISË
Kuvendi

PROJEKTLIGJ

PËR

KRIJIMIN E AGJENCISË KOMBËTARE TË DIASPORËS

Në mbështetje të neneve 78, 81, dhe 83, pika 1, të Kushtetutës me propozimin e Këshillit të Ministrave, Kuvendi i Republikës së Shqipërisë,

V E N D O S I:

KREU I
DISPOZITA TË PËRGGJTHSHME

Neni 1
Objekti

Ky ligj përcakton misionin, organizimin dhe funksionimin e Agjencisë Kombëtare të Diasporës, si dhe çështje të tjera që lidhen me veprimtarinë e saj.

Neni 2
Misioni

Agjencia Kombëtare e Diasporës ka për mision zhvillimin dhe thellimin e bashkëpunimit institucional me diasporën, nëpërmjet:

- a) përmirësimit të pozitës së anëtarëve të diasporës, si dhe mbrojtjen e të drejtave dhe interesave të tyre në vendet ku ata jetojnë;
- b) ofrimit të ndihmës për ruajtjen e trashëgimisë kulturore kombëtare;
- c) nxitjes së bashkëpunimit ekonomik ndërmjet vendit të origjinës dhe diasporës;
- ç) bashkëpunimit për prosperitetin e të gjithë kombit, paqen, mirëqenien, kulturën dhe solidaritetin shoqëror.

Neni 3

Përkufizime

Në kuptim të këtij ligji, termat e mëposhtëm kanë këto kuptime:

1. **“Agjencia Kombëtare e Diasporës”**, këtu e në vijim “Agjencia”, është organi shtetëror përgjegjës për marrëdhëniet me diasporën.
2. **“Diaspora”** përfshin:
 - a) komunitetet e hershme shqiptare në botë;
 - b) çdo person i cili është lindur në Shqipëri dhe që jeton jashtë kufijve të saj;
 - c) çdo person i cili ka lindur jashtë kufijve të Shqipërisë, por ka origjinë shqiptare.
3. **“Ministër përgjegjës”**, ministri që mbulon fushën e veprimtarisë shtetërore për marrëdhëniet me diasporën.
4. **“Vend i origjinës”**, Republika e Shqipërisë.

Neni 4

Parimet e veprimtarisë

Agjencia organizohet dhe funksionon në bazë të këtyre parimeve të përgjithshme:

- a) Ligjshmërisë, kushtetutshmërisë;
- b) Parimit të bashkëpunimit;
- c) Parimit të gjithëpërfshirjes.

KREU II

ORGANIZIMI DHE FUNKSIONIMI I AGJENCISË

Neni 5

Organizimi i Agjencisë

1. Agjencia është person juridik publik, në formën e agjencisë autonome, me seli në Tiranë.
2. Veprimtaria e Agjencisë do të jetë nën mbikëqyrjen e ministrit përgjegjës për diasporën.
3. Organet drejtuese të Agjencisë janë Këshilli Drejtues dhe drejtori Ekzekutiv.

4. Struktura dhe nivelet e pagave për punonjësit e Agjencisë miratohen me vendim të Këshillit të Ministrave.
5. Struktura dhe organika e Agjencisë miratohen me urdhër të Kryeministrit.
6. Marrëdhëniet e punës për drejtorin Ekzekutiv dhe nëpunësit e Agjencisë rregullohen sipas dispozitave të parashikuara në legjislacionin për nëpunësin civil. Marrëdhëniet e punës së punonjësve administrativë rregullohen në përputhje me dispozitat e parashikuara në Kodin e Punës.
7. Agjencia ka logon dhe vulën e saj, të miratuar nga drejtori Ekzekutiv.

Neni 6

Detyrat e Agjencisë

Agjencia kryen këto detyra:

1. Për të garantuar procesin e regjistrimit dhe të drejtën e pjesëmarrjes së diasporës në votime, bashkëpunon me institucionet e tjera shtetërore dhe harton databazën e diasporës.
2. Merr masat për krijimin e databazës unike të diasporës dhe përcakton ndërveprimin nëpërmjet bashkëpunimit me bazat e tjera shtetërore të të dhënave;
3. Krijon kushtet infrastrukturore për të garantuar të drejtën e votës për shtetasit shqiptarë në vendet ku ata jetojnë;
4. Zbaton politikat dhe projektet që lidhen me diasporën;
5. Përgatit raporte periodike, të cilat ia paraqet ministrit përgjegjës;
6. Përgatit dhe koordinon punën për hartimin e Strategjisë Kombëtare për Diasporën dhe ndjek zbatimin e saj;
7. Përmirëson lidhjet ndërmjet diasporës, organizimeve të saj dhe vendit të origjinës;
8. Përgjigjet për funksionimin dhe menaxhimin financiar, si dhe kontrollon periodikisht realizimin e tij;
9. Bashkëpunon dhe koordinon aktivitetet me institucionet e tjera shtetërore, shoqërinë civile dhe organizatat e tjera brenda dhe jashtë vendit për përmirësimin e pozitës së anëtarëve të diasporës;
10. Ndhmon në ruajtjen dhe zhvillimin e vlerave kombëtare e kulturore të anëtarëve të diasporës;
11. Informon diasporën mbi proceset politike në vendin e origjinës, me qëllim përfshirjen e tyre në jetën politike, ekonomike dhe kulturore të Republikës së Shqipërisë;
12. Administron asetet.

Neni 7

Këshilli Drejtues

1. Këshilli Drejtues është organi vendimmarrës për çështjet administrative dhe financiare të Agjencisë.
2. Këshilli Drejtues është organ kolegjal, i përbërë nga shtatë anëtarë, nga të cilët:
 - a) një përfaqësues nga ministri përgjegjës për diasporën;
 - b) një përfaqësues nga ministria përgjegjëse për Evropën dhe punët e jashtme;
 - c) një përfaqësues nga ministria përgjegjëse për punët e brendshme;
 - ç) një përfaqësues nga ministria përgjegjëse për financat dhe ekonominë;
 - d) një përfaqësues nga ministria përgjegjëse për arsimin, sportin dhe rininë;
 - dh) një përfaqësues nga ministria përgjegjëse për kulturën;
 - e) një përfaqësues nga Komisioni Qendror i Zgjedhjeve.
3. Ministri përgjegjës emëron kryetar të Këshillit Drejtues njërin prej anëtarëve të tij.
4. Masa e shpërblimit për kryetarin dhe anëtarin e Këshillit Drejtues përcaktohet me vendim të Këshillit të Ministrave.

Neni 8

Kompetencat e Këshillit Drejtues

Këshilli Drejtues ka këto kompetenca:

- a) Miraton programet e zhvillimit të Agjencisë, në përputhje me dokumentet strategjike për marrëdhëniet me diasporën.
- b) Miraton rregulloren për organizimin e brendshëm administrativ, funksionet dhe përgjegjësitë e strukturave të brendshme e të stafit administrativ e mbështetës;
- c) Ushtron kompetencat e parashikuara nga legjislacioni në fuqi për menaxhimin financiar dhe kontrollin;
- ç) Miraton planin e veprimit, financiar, raportin vjetor dhe raporte të tjera të Agjencisë;
- d) Merr vendime për çështje të tjera, në përputhje me detyrimet e legjislacionit në fuqi.

Neni 9
Drejtori Ekzekutiv

1. Drejtori Ekzekutiv është përgjegjës për administrimin dhe funksionimin e Agjencisë dhe e përfaqëson atë në marrëdhënie me të tretët.
2. Drejtori Ekzekutiv raporton dhe përgjigjet përpara ministrit të Shtetit për Diasporën.

Neni 10
Burimet dhe mënyrat e financimit të Agjencisë

1. Burimet financiare të Agjencisë janë:
 - a) të ardhura pjesërisht nga buxheti i shtetit;
 - b) të ardhura nga projekte, donacione dhe burime të tjera të ligjshme.
2. Për qëllime të zbatimit të këtij ligji dhe veprimtarisë përkatëse, Agjencia mund të ftojë subjekte të tjera, vendase ose të huaja, për bashkëfinancim projektesh të cilat do të kontribuojnë në mbajtjen dhe forcimin e lidhjes ndërmjet vendit të origjinës dhe diasporës, sipas legjislacionit në fuqi.
3. Kriteret, procedura për akordimin e fondeve për bashkëfinancim të projekteve dhe mënyra e raportimit për zbatimin e tyre të jenë në përputhje me legjislacionin në fuqi për menaxhimin e sistemit buxhetor në Republikën e Shqipërisë.

KREU III
KOMPETENCAT PËR MARRËDHËNIET NDËRMJET VENDIT TË
ORIGJINËS DHE DIASPORËS

Neni 11
Politikat e vendit të origjinës për diasporën

Këshilli i Ministrave përcakton politikat e vendit të origjinës për diasporën, për t'u zbatuar nga ministri përgjegjës, agjencia dhe autoritete të tjera shtetërore, në përputhje me fushën e tyre të veprimtarisë.

Neni 12
Ministri përgjegjës për diasporën

Ministri përgjegjës për diasporën mbikëqyr veprimtarinë e Agjencisë dhe ushtron këto kompetenca të veçanta në fushën e marrëdhënieve me diasporën:

- a) I propozon Këshillit të Ministrave nxjerrjen e akteve rregullatore dhe marrjen e masave të tjera të nevojshme për realizimin e politikës shtetërore për marrëdhëniet me diasporën;
- b) Mbikëqyr zbatimin e Strategjisë Kombëtare për Diasporën;
- c) Monitoron marrëdhëniet me diasporën dhe mban të dhëna për organizimin e saj në forume;
- ç) Bashkëpunon me ministritë përgjegjëse për kulturën, Evropën dhe punët e jashtme, për themelimin e qendrave kulturore dhe informative në vendet ku jeton diaspora;
- d) I propozon Kryeministrit dhënien e çmimeve për kontribute të veçanta në ruajtjen dhe forcimin e lidhjeve ndërmjet vendit të origjinës dhe diasporës, si dhe për kontribute të veçanta në promovimin e Shqipërisë në botë;
- dh) Ushtron kompetenca të tjera sipas legjislacionit në fuqi;
- e) Raporton në Kuvend një herë në vit.

Neni 13
Bashkëpunimi ndërinstytucional

1. Autoritetet shtetërore bashkëpunojnë në mënyrë të ndërsjellë për të përmbushur detyrat e tyre në fushën e marrëdhënieve ndërmjet vendit të origjinës dhe diasporës.
2. Ky bashkëpunim realizohet nëpërmjet raportimeve të përbashkëta dhe koordinimit të aktiviteteve, sipas mënyrës së përcaktuar me vendim të Këshillit të Ministrave.

KREU IV
DISPOZITA TË TJERA

Neni 14
Strategjia Kombëtare për Diasporën

1. Strategjia Kombëtare për Diasporën ka për qëllim ruajtjen dhe forcimin e marrëdhënieve ndërmjet vendit të origjinës dhe diasporës si dhe identifikon gjendjen aktuale të këtyre marrëdhënieve dhe veprimet që duhen ndërmarrë për zhvillimin e tyre.

2. Strategjia miratohet me vendim të Këshillit të Ministrave, me propozimin e ministrit përgjegjës për diasporën.
3. Ngarkohet Agjencia Kombëtare e Diasporës për të rishikuar në mënyrë periodike dokumentin e strategjisë. Ky dokument për herë të parë hartohet nga strukturat *ad hoc*, të ngritura sipas legjislacionit në fuqi.

Neni 15
Dita e diasporës

Data 18 dhjetor caktohet si Dita Kombëtare e Diasporës.

Neni 16
Aktet nënligjore

1. Ngarkohet Këshilli i Ministrave për nxjerrjen e akteve nënligjore, në zbatim të neneve 5, pika 4, 7, pika 4, 11, 13, pika 2 e 14, pika 2, të këtij ligji.
2. Ngarkohet Kryeministri për nxjerrjen e aktit nënligjor në zbatim të pikës 5, të nenit 5, të këtij ligji.
3. Aktet nënligjore të parashikuara në këtë nen të nxirren brenda 3 muajve nga hyrja në fuqi e ligjit.

Neni 17
Hyrja në fuqi

Ky ligj hyn në fuqi 15 ditë pas botimit në "Fletoren zyrtare".

K R Y E T A R I

GRAMOZ RUÇI